

# **REPONS DEBA LO BIDZE 2020**

**DELIVRE PAR:**

**ANBASADER MAURICE LOUSTAU-LALANNE**

**MINIS POUR FINANS, KOMERS, LENVESTISMAN EK  
PLANIFIKASYON EKONOMIK**

**LENDI LE 11 NOVANM 2019**

Msye Spiker,

Onorab Lider Lopozisyon,

Onorab Lider Zafer Gouvernman

Manm Onorab Lasanble Nasyonal,

Ser konpatriyot Seselwa,

Bonzour

## **1. Lentrodiksyon**

Pandan sa trwa zour semenn pase, monn ekout bokou e monn ekout atantivman deba par bann manm onorab lo diskour bidze 2020. Gouvernman in osi ganny pwenvi diferan sekter e dimoun an zeneral. Mon konstate ki bokou in ganny dir pandan sa bann deba e mon oule asir sa lasanble ki Gouvernman pour travay pli dir pou fer sir, ki sa plan pour bidze 2020 i ganny realize.

Msye Spiker, permet mwan pour reponn enn de bann size ki bann manm onorab in leve pandan sa deba. Bann lezot pwen pou osi ganny leve pandan staz komite bidze 2020 e bann Minis konsernen i ava adres zot.

Msye Spiker, parey monn dir dan bidze 2020, Gouvernman i reste angaze pour nou realiz nou target pour redwir nou det par 50% GDP ver 2021. Sa i en target ki nou pou bezwen realize ver 2021.

Msye Spiker, bidze kin ganny propoze pour lannen 2020 i pou en sonm SR 960 milyon ouswa 11.5% ogmantasyon konpare avek revizyon dan depans 2019 ki pou en sonm total SR 8.33 bilyon. Sa ogmantasyon i pe ganny finansye par en ogmantasyon dan sa bann reveni swivan;

1. Reveni dan taks in ganny ogmante par SR 232.6 milyon
2. Reveni ki pa sorti dan taks in ganny ogmante par SR 278.3 milyon
3. Don in ganny ogmante par SR 502.5 milyon

Alors total koleksyon dan reveni ek don in ganny ogmante par SR 1 bilyon. Msye Spiker, nou balans primer in osi ogmante par SR 27.3 milyon letan nou regard balans primer pou 2020 konpare avek revizyon 2019.

Msye Spiker, sektor tourizm i reste sektor kle nou lekonomi. Parey monn dir dan lannons bidze, letan nou konpar kantite viziter dan trazyenm kar 2019 avek trazyenm kar 2018, larive viziter in ogmant par 5.4 poursan. Me sepandan, depans par sa bann viziter pandan menm peryod in ogmante sorti 341 milyon Ero pou ariv 376 milyon Ero, e sa i reprezant en ogmantasyon 10.2 poursan. Me letan nou konpar VAT ki SRC in kolekte dan sa sektor pandan menm peryod i selman en ogmantasyon SR 4 milyon ouswa 0.6 poursan.

Msye Spiker, letan nou regard lakantite deviz etranzer kin sorti dan pei ant Zanvye a Oktob 2019 i pou en valer total US\$ 290.1 milyon. Sa I en rediksyon 8.7 pousan letan nou konpar li avek menm period pour lannen 2018. Pour peryod 2019, 92 pousan sa bann deviz etranzer ki pe sorti dan pei, i sorti dan sa bann sekter swivan;

- a. Enportater pour aste komodite US\$ 91 milyon ki reprezant 31.4 pousan
- b. SEYPEC pour aste karbiran US\$ 52.1 milyon ki reprezant 18.0 pousan
- c. PUC pour son bann proze kapital US\$ 26.6 milyon ki reprezant 9.2 pousan
- d. Sekter telekominikasyon US\$ 23.1 milyon ki reprezant 8.0 pousan
- e. Bann lakonpanyen aeryen US\$ 20.1 milyon ki reprezant 7.0 pousan
- f. Bann lakonpanyen ki enport veikil US\$ 15.8 milyon ki reprezant 5.4 pousan
- g. Gouvernman pour bann depans parey lasante, ledikasyon e lezot depans US\$ 14 milyon ki reprezant 4.8 pousan
- h. Transfer personel US\$ 13 milyon ki reprezant 4.5 pousan
- i. Lakonpanyen Konstriksyon US\$ 9.8 milyon ki reprezant 3.4 pousan

## **2. Lankadreman Zesyon Depans ki baze lo Rezilta**

Msye Spiker parey mon ti dir dan lanons bidze 2019, Gouvernman pe revwar son format lo zesyon depans pour met plis konsantrasyon lo en lankadreman ki baze lo rezilta. An 2013 Gouvernman ti aprouv polisi lo ‘Results Based Management’ ki konpri 4 pilye- (i) bidze ki ganny fer lo metod program, (ii) ‘strategic planning’ (iii) ‘Monitoring and Evaluation’ and (iv) performans travay (PMS). Bokou travay in ganny fer depi sa.

Msye Spiker, sa prosesis pour fer bidze lo metod Program ‘Performance Based Budgeting’ (PPBB) ti konmanse depi 2015 avek en en sistenm pilot pour Minister ki annan portfolyo ledikasyon, lagrikiltir ek lapas. Sa metod

ti ganny lanse dan senk minister dan bidze 2017, e i ti ganny elarzi pour enkli ankor trwa Minister dan bidze 2018, e dan bidze 2019 e bidze 2020, tou minister in ganny enkli. Alors Msye Spiker, tou Minister, Departman e Lazans I annan zot endikater lo performans baze lo alokasyon bidze. Zis pou nonm enn de.

1. Lazans Swen Pour Lasante, lo paz 474 liv bidze, enn son endikater an 2020 se pour redwir to mortality dan Lopital Sesel par 0.5%.
2. Departman Ledikasyon, lo paz 388 liv bidze, target pour 2020 si pou fer sir ki 50 poursan etidyan S5 ki fer legzanmen IGCSE maths i ganny en grad C ouswa par lao.
3. Departman Finans, lo paz 269 liv bidze, enn son endikater pour fer sir ki prozeksyon lo real GDP growth i anba 3 poursan.
4. Departman Imigrasyon ek Stati Sivil, lo paz 526 liv bidze, enn son endikater an 2020 se pour fer sir ki tou aplikasyon pou paspor I ganny fer dan 24 erdtan.

Pilye ‘strategic planning’ ti ganny met an mosyon an 2017 avek laprovasyon en ‘strategic planning policy’. Sa polisi I fer ki tou ban MDA’s I bezwen prepar zot plan stratezik ki konpri zot bann program, proze ensi bann endikater pou mezir progre. Zot plan I osi ganny relye avek zot bidze atraver zot dokiman ‘MTES’.

Avek lansman, vizyon 2033 e Stratezi devlopman nasyonal 2019-2023 travay pou ganny fer pou konplet bann stratezi sektoral e asire ki zot anliny avek vizyon nasyonal. Nou pou osi fer sir ki bidze dan tou sekter i ganny anliny avek stratezi devlopman nasyonal. Msye Spiker, lot pilye ki nou’n komans pilote i *Monitoring and Evaluation*. Tou bann endikater performans ki ganny mete dan bidze nasyonal pour ganny evalye anyelman baze lo zot endikater. Bann Minister, Departman ek Lazans pour bezwen donn rezon si en endikater i pli ba ki ekspektasyon. Reform dan sa katriyenm pilye in osi konmanse pour annan en lankadremman pour asire ki Gouvernman i kapab delivre son servis efektivman e avek efikasite e sa pour konsern performans travay tou travayer sekter piblik.

Sa bann reform i adres bann koncern ki pe ogmante vizavi performans zesyon servis piblik. Msye Spiker, Gouvernman i alors lo bon semen pou konplet lenplimantasyon lankadremman *Results Based Management* an 2021.

### **3. Lantrepiz Piblik**

#### **a. Air Seychelles**

Msye Spiker, Air Seychelles I reste sa polisi lasirans ki neserer pou sof gard nou sektè tourizman konman pilye nou lekonomi. Sa lasirans ozordi I vin ek en pri e nou tou nou pe kontribye pou fer sir ki Air Seychelles I annan sa kapabilite pou fer vol enternasyonal. Se pou sa rezon ki dan bidze 2020 I annan SR 105 milyon rounpi.

Msye Spiker, SCAA, Air Seychelles e Gouvernman pe sinye an lagreman “exclusivity” pou Air Seychelles sa sel lakonpanyen ki annan sa dwa pou kontinyen provide Ground handling Services. Sa lagreman i ekspekte ganny sinye avan lannen 2019. Gouvernman i bezwen reste angaje pou fer sir ki Air Seychelles i reste sa sel lakonpanyen ki donn sa servis Ground Handling. En lot lagreman ki pe al ganny sinye se permi Ground Handling ki pou ant SCAA e Air Seychelles. Sa i en lakadremman ki pou fer sir ki tou le de, SCAA e Air Seychelles i konn byen zot ekspektasyon dan loperasyon Ground Handling. Msye Spiker, mon oule fer resoti ki Etihad i annan 40 pousan shares dan Air Seychelles alors endirekteman i annan 40 pousan shares dan ground handling. Me mon oule fer resoti osi ki Ground Handling pa pou ganny servi konman okenn garanti negosyasyon ki finalize.

Msye Spiker parey monn dir dan lanons bidze, Gouvernman pe finaliz en garanti labank lavalèr US\$ 30 milyon pou sa sonm ki pou bann ‘Preference shares’ an faver ‘shareholder’ Etihad, baze lo bann det ki Air Seychelles in akimile vizavi Etihad pandan sa bann dernyen lannen. Nou pe fer negosyasyon avek de labank e nou ekspekte finaliz avan Novanm 2019. Sa labank ki nou finaliz negosyasyon avek, pou donn sa

garanti Etihad e Gouvernman pour donn en sovereign garanti sa labank. Sa se aköz Etihad pan aksepte en sovereign garanti direk ek Gouvernman.

Msye Spiker, pli gran risk ki annan lo Air Seychelles dan mwayen term se son abilite pou repey sa project box bond ki mature US\$ 21.5 milyon le 28 Septanm 2020 e US\$ 50 milyon le 1 Zen 2021. Etihad in garanti sa bond. Nou pou bezwen rod en solisyon pour refinans sa project box dan mwayen term.

### **b. SCAA**

Msye Spiker, swivan lentervansyon bann manm Onorad lo SCAA ki mon ti mansyonnen dan bidze, mon ti a kontan eklersi konm swivan:

1. I dan plan SCAA pou refer terminal enternasyonal pou met li lo en pli o standar parey nou vwar kot terminal domestik. Dapre bann analiz ki'n ganny fer, i pli fezab pou repar terminal enternasyonal olye al fer en terminal nef ki pou kout environ \$200m. Sa i baze lo lakantite touris ki nou espekte pou sa bann lannen ki pe vini.
2. Rezon ki SCAA pe fer nouvo headoffice avan, se pou li kapab tir tou son bann travayer kot son headoffice aktyel i ete. Sa i ava permit li ganny lespas pou li agrandir lasal arive, kot i pou met en dezyenm karousel bagaz parey nou dir an Angle Conveyor Belt. I pou osi annan plis lespas pou lasal imigrasyon. Myse speaker, sa i pou ede rezourd sa problemn lespas ki i annan ozordi.
3. Apre ki proze lasal larive i konplete; travay pou kontinyen pou agrandir checkin area, swivi par lasal depar.
4. I enportan ki sa bann proze i swiv dan sa lord lefe ki loperasyon airport pou kontinyen dan sa letan.

Msye Spiker, mon ti a kontan osi eklersi lo sa size peyman fre navigasyon par bann loperater lokal. Pou le moman, lalwa i fer lesepsyon pou bann vol ki par anndan 200 notik avek Pralen i pa pey fre navigasyon. Savedir bann vol par Air Seychelles, IDC, Zil Air lo bann zil pros i pa ganny kouver. Fre navigasyon i aplikab lo bann zil parey Alphonse, Farquhar, Astove ek Assumption. Loperasyon lo bann zil tel ki Pralen, La Digue, Fregate, Bird Island, Denis Island, Silhouette, Desroches, Coetivy,

Darros, Marie-Louise, Remire ek Poivre i pa ganny peye. Ler mon dir fre navigasyon, i vedir “Air Navigation charges” parey nou dir an Angle. Selman Landing fees i ganny peye.

SCAA i dan proses pou sanz lalwa pou fer ki tou loperasyon i pey fre navigasyon, sa i enkli loperasyon anndan 200 notik, akoz sa i reprezant en gran poursantaz aktivite trafik dan nou lespas. I pou ed SCAA fer plis larzan pou li investir dan son lenfrastruktir navigasyon.

### **c. Seychelles Trading Company**

Msye Spiker, En sa ki konsern “middlemen”, STC inn fer resorti ki pour bann prodwi anba kategori 1, STC i aste direk avek prodikter e pou bann lezot komodite ki ‘perishables’ sa bann i ganny aste avek bann “pack houses”. Sa ki konsern diri ek dile, sa i ganny aste avek bann lakonpanyen ki “process” sa bann marsandiz. Msye Spiker, fodre fer resorti ki tou bann prodwi anba kategori 1 i ganny aste antraver en prosedir tender entern e STC i swazir sa ki ofer pli bon pri e kalite.

Msye Spiker, sa ki konsern “branded item” parey koman “Kerry gold dairy product, Danone yoghurts, Fan juices, Riscossa pasta” pour nonm ende, sa STC I aste avek prodikter akoz STC ki lazans e distribiter. Pareyman i annan lezot enportater lokal ki i lazans e distribiter serten “brand”, alors STC i bezwen aste avek zot ler ki konsomater i demann sa bann prodwi, par egzanp, dantifris Colgate, prodwi ti baba ‘Johnson and Johnson’ avek Capital Trading, prodwi Nestle avek Sun Shipping, Regilait avek Vinayaka Impex e prodwi Tulip pork avek Kannu.

Msye Spiker, ler STC pour fer vini “containers” avek diferan marsandiz e envi ki volim pa bokou, dan sa ka STC i pas atraver bann “Traders”. En legzanp I bann prodwi sorti Lafrans, tel ki bann “brand” parey Top budget, Apta, Label. En lot legzanp i seafood “container” sorti kot Mascareignes - Moris. En order minimum pour seafood I en container, alors nou bezwen aste avek sa trader ki kapab vann nou en container ki konteni diferan prodwi seafood. Sa I normal dan sekter trading e nou apel li konsolidasyon. Msye Spiker, fodre nou realize ki Sesel i en ti pei e nou

demann i pa sitan gro alors nou bezwen servi sa bann “traders” ki nou ganny economies of scale.

#### **4. Ease of Doing Business**

Msye Spiker, an se ki konsern lendeks “Ease of Doing Business” noun soumet avek Labank Mondyal, serten sanzman kin ganny fer pandan sa dernyen lannen. Sa bann sanzman ti plito konsern anrezistremen en biznes kot Rezistra, ganny en permi pou konstriksyon e ganny koneksyon elektrisite. Labank Mondyal lo son kote, I verifye sa lenformasyon avek bann azan sekter prive ki normalman servi sa servis e de la si sekter prive i konfirman ki sa sanzman I ganny pran an kont dan zot evaliasyon. Par kont si napa sa konfirmasyon par sekter prive, sa lenformasyon pa ganny servi.

An rezilta sa legzersis, malgre ki noun rekil ankor dan rapor pour 2020, noun fer progre dan trwa parmi sa 10 paramet kin ganny evalye.

Pou Permit Konstrikasyon noun sorti 118 pou vin 106 enm e dan paramet pou ganny koneksyon elektrisite noun sorti 118 pou vin 104 enm.

Noun osi vwar en pti amelyorasyon dan Enforcing Contracts par 1 plas. Sorti 129 pou vin 128 enm.

Malerezman malgre noun soumet serten amelyorasyon dan Anrezitreman Biznes sa pann ganny konfirman par bann lazans sekter prive ki servi sa servis e kinn raport avek Labank Mondyal alor sa lenformasyon pann ganny pran an kont.

De lot kote, noun rekile dan 7 lezot paramet, avek pli gro deklinasyon dan “Protecting Minority Investors”, sorti 110 pou ariv 143 enm par 33 plas. Lot tonbe signifikan i dan “Getting Credit” kot noun tonb par 10 plas pou vinn 144 enm.



Pour “Starting a Business”, “Registering Property”, “Paying Taxes” e “Trading Across Borders” e “Resolving Insolvency” noun tonm par 2, 3, 5, 3 e 2 plas respektivman.

Pour ‘Protecting Minority Investors’, nou deza annan revizyon Companies Act ki biro Prokurer Zeneral pe travay lola. Enn fwa ki sa inn konplete, I devret amelyor nou klasman.

Pour “Getting Credit” nou osi annan bann travay ki an kour avek Labank Santral, Biro Prokurer Zeneral e Biro Rezistrar tel ki bann regilasyon anba sa Secured Transaction Act e “Collateral Registry” ki kapab fasilite akse avek lon. Malerezman sa travay pankor konplete.

I osi annan lezot mezir ki pe ganny fer pou adres bann lezot paramet.

## **5. Cable and Wireless**

Msye Spiker, Gouvernman i salye zefor sa group lenvestiser Seselwa kin aste lakonpanyen Cable and Wireless Seychelles. Gouvernman I osi ankouraze avek zot prononsman ki zot pou konsantre lo biznes pou fer sir I kontinyen amelyore e vwar bann lezot loportinite pou fer sir ki I annan lagrandisman dan long term. Zot in osi fer resorti ki zot pou vann par dan lakonpanyen cable and wireless avek bann lenstitisyon ek endividi. Alors mon demann lepep Seselwa pour servi sa loportinite kan I ekziste.

Liberty Global ti aste Cable and Wireless an 2016 e ti dwa Gouvernman US\$ 16.5 milyon sanksyon lo sa tranzaksyon. Cable and Wireless i annan de propriete, enn dan Viktorya (V5326) e lot Bon Espwar (C3003), ki Gouvernman dan son negosyason avek Liberty Global ti agree pour aste pour en sonm US\$ 2.5 milyon. Alors sa sonm lo sanksyon ki Liberty Global ti redwir pour vin US\$ 14 milyon.

Dan negosyason avek Liberty Global, sa group lenvestiser Seselwa (CWSI) ti agree pour pran sa det avek Liberty Global. Gouvernman ti ganny konsilte e dan diskisyon en lagreman ‘ tri-partile Novation’ ti ganny sinyen agree pou sa det pour en sonm US\$ 14 milyon i ganny peye avan lannen 2019 i konplete. Msye Spiker, sa nouvo tranzaksyon ant Liberty Global ek sa group lenvestiser Seselwa pour bezwen pey 5% stamp duty lo zot ‘Consideration value’ letan zot finaliz bann dokiman an rezistremman avek Rezistra Zeneral.

Msye Spiker, lakonpanyen Cable and Wireless Seychelles in reste dan lenvestiser etranze depi son legzistans 125 an pase. E alors sa konfidans ki nou bann entrepreneur lokal i demontre ki Sesel i reste konman en pei ki kapab atrakte lenvestisman. Pou Gouvernman sa i nou swe ki i premye gro lenvestisman par nou Seselwa e i annan bokou ankor ki kapab ganny realize si nou kontinyen travay ansanm.

## **6. Fondasyon Zil Sesel (SIF)**

Ansemoman i annan diznef gid prive ki pe ofer servis gid bann viziter dan Valedeme. E statistik i montre ki ziska mwan Oktob sa lannen sa 19 gid prive in ofer servis a en total 18% bann touris kin vizit Valedme. 28% bann touris ki vinn vizit valedme in vin atraver bann lazans touris ki enkli Mason’s Travel, Creole Travel Services e 7 Degrees South . E sa bann lazans i vin avek zot prop gid e reprezantan.

Fondasyon Zil Sesel (SIF) i ofer selman 2% servis gid gratwit bann viziter e sa i ganny ofer de fwa par zour a en ler spesifik. E sa i 9er bomaten e 2 er apremidi.

Sa sif i montre ki selman 48% touris ki vin vizit Valedme ki pe ganny gide ansemoman. I reste alor 52% viziter ki pa pe resevwar servis gide a sa moman, e sa i montre ki annan en gran potansyel biznes pou ofer servis gid an general.

## **7. Bann lezot Depans dan Bidze**

Msye Spiker, nou bezwen en zefor kolektif pour tir nou bann zenn dan bann aktivite anti-sosyal e met bann aktivite pour permet zot develop. Mon lans en lapel avek Sosyete Sivil pour zwenn ek Gouvernman pour zwe en rol aktif dan sa prosedir, espesyalman pour fer aplikasyon bann grant pour bann proze kominoter dan sa domenn. Sepandan i annan bann diferan programm lazenes e sport dan bidze konm swivan;

- SR 948,000 dan bidze Departman Lazenes e Sport pour programm Lazenes Enternasyonal Edinburgh pour bann zenn laz 14 a 24 an pour fer diferan aktivite.
- Konseye Nasyonal Pour Sport
  - Aktivite Rezyonal SR 2 milyon
  - Youth Academy SR 500,000
  - Devlopman Pour Lazenes e Sport SR 1.2 milyon
  - Zwe Lespwar pour bann lekol SR 1.2 milyon
  - Konpetisyon Rezyonnal Pou Sailing SR 360,000
  - Konpetisyon Rezyonnal Pou Table Tennis SR 400,000
  - Olympic Games SR 500,000
  - Preparasyon pour zwe Losean Endyen SR 957,700
- Konseye Nasyonal Lazenes in ganny en alokasyon SR 2 milyon pou son diferan aktivite rezyonal, festival lazenes, programm dan vakans ek bann lezot programm.

Msye Spiker, distrik Ans Bwalo in ganny bokou proze dan bidze 2020, konm swivan;

- Re-abitasyon stasyon tenny dife SR 2 milyon
- Road Diversion RC mission SR 5.2 milyon
- Semen Caiman Estate SR 300,000
- Proze Land Bank Grand Bois SR 2.9 milyon
- Proze miray ek renovasyon kot lekol SR 2.38 milyon
- Proze konstruksyon lasal a manze e laklas SR 3.27 milyon
- 18 lakaz ex cable and wireless I ekpekte ganny donnen avan lannen 2019 I konplete

- I osi annan ankor 24 units dan proze 3,000 lakaz

Msye Spiker, CINEA ti demann SR 40 milyon dan bidze pour renovasyon ICCS. Gouvernman I rekonnèt ki ICCS I bezwen en renovasyon mazer. Me konman en Gouvernman responsab, nou bezwen vwar li dan son totalite. Alors Gouvernman, in demann Departman Lenfrastriktir pour zwenn ek CINEA pour fer en assessment lo son totalite pou vwar konmyen pou koute pou fer sa renovasyon mazer lo ICCS. Nou ekspekte sa travay ganny konplete dan premye kar 2020.

Proze pour lekòl La Rosiere pe al ganny met lo tender, la ki tou laprouvasyon in ganny resevwar.

Msye Spiker, sa proze 3,000 lakaz dan senk an pou konmanse dan 2020. Parey mon ti annonse dan bidze 2019, sa proze 3,000 lakaz pou ganny finanse avek en don ek en lon sorti kot Gouvernman Endyen dan en special purpose vehicle. Sa SPV pou kapab repey son lekor dapre nou estimasyon. Gouvernman Endyen pe osi finans bann pti proze devlopman dan tou sekter dapre en lagreman ki ti ganny sinyen le 25 Zen 2018. Sa lagreman I pou senk an. E en sonm SR 35 milyon total i disponib ki nou pa kapab desote a sak moman. Alors bann Minister, Departman e Lazans i bezwen fer sir ki nou pran sa loportinite finansman pou fer otan proze ki nou kapab.

Msye Spiker, proze semen Pasquere Pralen in deza konmanse. Me Gouvernman in met Selman SR 4 milyon dan bidze 2020 pou fer en lot faz sa proze. PUC in konfirman ki Design proze Dam ki dan zalantour pe al ganny tender. Alors Gouvernman in bezwen fer sa semen Pasquere avek kosyon. Nou bezwen les design dam konplete apre ki nou a kapab met plis larzan dan bidze pour konplet sa proze.

PUC i anvizaze ki 17 Proze fotovoltaiik pou ganny fer lo bann batiman Gouvernman. 14 sa bann proze in fini konplete e sa I enkli batiman Lasanble Nasyonal e Osi State House. Msye Spiker, parey bann manm

pou note ki bidze Lofis Prezidan in ganny redwir par 600,000 dan son vot elektrisite avek sa lenstalasyon sa proze fotovoltaiik.

Msye Spiker, dan bidze 2019 SR 20.33 milyon ti ganny bidzete dan Lazans Swen Lasante konm swivan bann professional dan Allied Cadre, enzenyer Bio Medikal cadre, Farmasi, dokter ek dantis e bann lezot.

Msye Spiker, nou bezwen donn kredi kot I fodre. Mon konstate ki komite Finans ek Kont Piblik dan lasanble in asiste dan travay pou reform L'Union Estate. Me nou bezwen rekonnet ki sa I apre ki Konmisyon ki Sirvey bann Lantrepriz Piblik (PEMC) ti konplet zot evaliasyon lo L'Union Estate. Alors nou bezwen rekonnet ki sa konmisyon pe osi fer en bon travay avek zot resours ki zot annan. Mon salye zefor sa bann travayer PEMC.

Msye Spiker, parey mon ti anonse dan bidze 2019, nou ti konmans en reform dan konsolidasyon tou bann revenue bann Lazans ki ti dan kont suspense ek Gouvernman, pour met zot dan bidze. Sa ti aplikab osi pour Fondasyon Nasyonal pour bann Zarden Botanik ki si zot regard byen liv bidze lannen 2019 lo paz 13, zot ti a war ki reveni sa lazans ti ganny mete dan bidze. Sepandan noun travay ek sa lazans pandan 2019, pou vwar sa prozeksyon ki nou ti fer 2018, e noun reviz sa prozeksyon pli o.

Msye Spiker, SPTC in deza preske konplet son negosyason avek Lakonpanyen lasirans lo sa ka dife e sonm kin zot in agree i SR 23 milyon. En premye peyman SR 10 milyon in fini ganny peye e zot in deza agree lo en schedule pou repey sa balans. SPTC pou Servi sa larzan dan son bann proze kapital pandan 2020.

## **8. Nouvo Polisi dan Bidze 2020**

### **a. Revizyon dan Alawenns Personnel pour Lapos ek Kourye ki san taks**

Msye Spiker, monn ekout byen tou le de kote latab, e menm bann lopinyon piblik lo mon lanons dan bidze konsernan alawenns personnel par lapos e kourye. Rezilta sa, e avek konsiltasyon entern, Gouvernman in pran desizyon pou kit alowenns personnel par lapos e kourye a SR 3,000, me fre ladwann pou ganny ogmante sorti SR 50 parey ti ganny anonse dan mon lanons bidze 2020 pou vinn SR 100. Sa pou pran lefe le 1 Zanvye 2020. Msye Spiker, i montre ou ki Gouvernman i en Gouvernman ki ekout son pep.

Depi Zanvye ziska Out sa lannen 94,815 pake ti ganny enporte par lapos e sa pa enkli bann ki ganny enporte par kourye. Sa I demontre la kantite pake ki ganny enporte e lefe ki annan lo lekonomi.

Mon anvi fer rapel ki napa okenn taks, ni taks ladwann, ni tax lo VAT lo bann komodite ki Gouvernman in kategoriz konman esansyel. Sa i enkli bann prodwi pour pti baba e latizann. Sa i vedir ki menm si sa alawenns personnel par lapos e kourye i ganny servi, e lenportasyon sa bann prodwi ki napa taks lo la i par lao sa alawenns ti pou zis annan peyman fre ladwann.

### **b. Sanzman dan striktir taks pour labwason alkolize**

Dan diskour bidze 2020, mon ti anonse ki Excise taks lo lalkol pou mont par 10%. Sa mezir in ganny met an plas antretan ki Gouvernman I kapab finaliz bann mezir e provizyon nesaser pour reviz fason takse lalkol, parey ti ganny anonse dan diskour leta lanasyon 2019 par Prezidan Larepublik.

Sepandan, en legzerzis ki noun kapab fer an se moman se an relasyon avek “alcopops”. Alcopops ti ganny enkli dan lalwa tariff e klasifikasyon pou lavantaz bann labwason alkolize ki deza ganny melanze parey “Smirnoff red e Bacardi breezer”, e ki annan e ba to lalkol. Sa kategori bwar i pey en nivo excise taks SR 24.50 par lit. Problem ki nou pe rankontre avek serten prodikter lokal se ki zot pe klasifye bann ronm ki annan ‘flavoured’ e bann ‘sherry’ anba sa kod pou zot pa pey taks pli o. Se pour sa rezon, ki nou pe reviz limit lo poursantaz lalkol pou “alcopops”, sorti 16% pou vin 8%. Sa pou fer sir ki zis bann labwason ki annan en nivo lalkol ba ki pou kapab aplik en nivo excise taks ba e bann lalkol ki annan en nivo lalkol pli o par egzanp 15% pou ganny takse en nivo taks pli o. Dan serten sironstans, avek sa ogmantasyon 10% lo lalkol kinn ganny anonse bann ronm lokal pou ganny takse SR158.40 par lit, dan plas SR 26.95 par lit. Sa I reflekte en logmantasyon excise taks SR 45.94 par boutey.

Lo sa menm not, mon anvi fer resorti dapre statistik Minister lasante konsonmasyon lalkol i kontinyelman reste enn ban faktor mazer ki kontribye dan nonm ka maladi kardyovaskiler e lezot konplikasyon lasante. Sa bann lenplikasyon i pa zis poz en presyon lo bidze

Gouvernman me osi lo lavi sosyal ki se pour sa rezon ki Prezidan ti anons sanzman lo polisi lavant e prodiksyon lalkol dan son diskour leta lanasyon an Fevriye 2019. Sa de sanzman kinn ganny anonse pou pran lefe le 1 Fevriye 2020.

### **c. Revizyon dan Taks Veikil**

Dan diskour bidze 2020, mon ti anons trwa sanzman ki pou ganny efekte lo transpor. Bann manm onorab in debat bokou lo sa bann sanzman dan zot larepons bidze. Me mon oule fer resorti ki nou pe anganze pour nou travay avek bann lazans ki enport veikil dan pei.

An se ki konsern logmantasyon taks lanvironnman lo veikil komersyal pour aliny li avek sa ki aplikab avek bann veikil prive, rezon akoz ki Gouvernman in pran sa desizyon se ki lenpak en transpor lo lanvironnman I egal irespektiv si i ganny servi pou rezon prive ou komersyal.

Sa logmantasyon SR 25,000 I form par langazman Gouvernman pou kontinyelman antreprann bann mezir ki kontribye dan proteksyon nou lanvironnman.

Ziska 2018, excise taks lo transpor ibrid ti ganny mete a en to 5% pou rezon ki sa bann veikil ti ganny persevwar pour annan en lenpak pli favorab lo lanvironnman konpare avek transpor konvansyonel. Swivan lobzervasyon Gouvernman lo statistik transpor ibrid kin antre swivan aplikasyon taks pli ba lo sa kalite transpor, in ganny remarke ki in annan logmantasyon sibstansyel zeneralman lo nonm transpor ki antre dan pei



konpare ek oparavan, espesyalman lenportasyon bann veikil ibrid par lao 1600 kapasite silenn. Sa i vedir ki benefis lanvironnman ki pei ti ekspekte zour avek sa rediksyon ki ti ganny fer initisyalman an 2016 in senpleman ganny erode par sa logmantasyon. Sa logmantasyon dan lenportasyon dan sa bann transpor in osi annan en lefe lo deviz etranzer ki sorti dan pei, kin an retour kontribye pou met presyon lo nou rezim moneter.

Se pou sa rezon ki an 2018, Gouvernman ti revwar taks minimonm lo transpor ibrid pou vin 12.5% pou bann transpor avek en kapasite silenn mwens ki 1600 e son taks maksimonm, 100% pou bann transpor ki annan en kapasite silenn plis ki 2500. Vi ki avek plis resers Gouvernman inn etabli ki bann veikil ibrid ki son kapasite silenn i plis ki 1600 i annan mwens benefis lo laspe lanvironnman e lekonomi ki en transpor konvansyonel ki son kapasite silenn i mwens ki 1600. Alors, noun pran desizyon pou anmenn nivo taks bann veikil ibrid avek en kapasite silenn plis ki 1600 lo menm nivo avek bann veikil konvensyonel.

Sa de sanzman dan polisi taks lo veikil, I an giz pou ankouraz dimoun ek biznes pou aste loto hybrid par anba 1600 kapasite silenn e veikil elektrik, ki relye avek polisi Gouvernman lo proteksyon lanvironnman e son konbat kont sanzman klima.

Sa bann logmantasyon kinn ganny anonse pa pou afekte moter avek skouter e pou pran lefe le 1 Fevriye 2020.

Finalman, mon ti a voudre konfirman ki bann dimoun kinn deza fer depozit oubyen fer peyman antye lo zot loto avan lanons bidze le 31 Oktob 2019 e ki zot transpor pe ariv apre le 1 Fevriye 2020, pou pey taks aplikab avan sa dat. Pou kapab rezouir lo taks aplikab avan le 1 Fevriye 2020, zot bezwen annan laprev ki peyman ti ganny fer avan le 31 Oktob 2019.

#### **d. Nouvo Kategori Permi Travay**

Msye Spiker, bokou in ganny dir lo sa nouvo kategori GOP pour bann travayer ki'n dan pei pour plis ki 10 an. Sa to GOP pour ogmante sorti SR 500 pour vin SR 5,000 par mwan. Avek bi pou fer sir ki sa bann travayer etranze pa kalifye pour ganny en permi reste a long term dan Sesel e ankouraz anplwayer pour trouv travayer Seselwa pour met dan sa bann pozisyon. Msye Spiker, zis mon donn en legzanp dan lendistri touris. Zot dir ki napa Seselwa kalifye, me Gouvernman in travay dir pou fer sir ki tou le lannen I annan apepre 12-13 zenn ki graduate kot Kolez Shannon. Me eski sa lendistri in donn sa bann zenn sa sans pou pran sa bann pozisyon lo nivo management? Mon poz sa la Msye Spiker. Sepandan, nou pe modifye sa polisi apre ki noun ekout repons bidze

Sa bann travayer etranze ki travay Sesel pandan 10 an, pour annan opsyon pour kit pei pandan en lannen e si zot retournen zot pou kapab travay avek menm lakonpanyen e konmans peyman sa to GOP lo SR 500 par mwan ankor. Me si sa travayer etranze I reste apre son 10 an, sa anplwayer pou bezwen pey sa nouvo kategori GOP ki pou SR 5,000 par mwan.

### **9. Depans Pour Bann Benefis ek Program Lazans Proteksyon Sosyal**

Msye Spiker, bokou in ganny dir lo bidze pour bann benefis ek program lazans Proteksyon Sosyal ki pou en total bidze SR 1.46 bilyon. Me bann manm onorab pan sitan fer resorti ki SR 770 milyon i pou benefis retret pour nou bann dimoun aze ki me ogmante sorti SR 5,250 pou ariv SR 5.750 par mwan. Sa bidze pour sa group benefis retret i reprezant 52.8 pousan.

Bann lot pli gro porsyon sa bidze, i konm swivan;

- Benefis Envalidite SR 113.8 milyon
- Benefis Dezabilite SR 103.5 milyon
- Skim Home Carer SR 292.0 milyon

Alors Msye Spiker sa kat pli gro depans i reprezant 88 poursan bidze total pour bann benefis ek program Lazans Proteksyon Sosyal konpare avek bidze Social Safety Net ki selman SR 47.8 milyon ouswa 3.3 poursan bidze bann benefis ek program sa Lazans.

Nou konstate ki reform i bezwen ganny fer dan sa bann benefis ek program pou fer sir ki depans i ganny targeted kot bann lakaz ki pli bezwen. Nou bezwen prenon ki nou popilasyon pe vin pli aze. Baze lo statistik kin pibliye par Statistik Biro, selman 10.7 poursan nou popilasyon i par lao 65 an, pou lannen 2019 me sa pou ogmante pou vin 15.7 poursan an 2035 e 18.1 poursan an 2040.

#### **10. Taks Aryeraz**

Msye Spiker, le 30 Septanm, aryeraz Komisyon Reveni ti pou en valen SR 997.8 milyon dan sa bann seksyon swivan;

- Taks Primer SR 517.9 milyon
- Penalti SR 479.9 milyon

Sepandan, sif ki Komisyon Reveni i kapab pourswiv I selman SR 538.8 milyon pour sa bann rezon swivan;

- SR 128.8 milyon i bann ka lobzeksyon ki kot seksyon legal kot Komisyon Reveni
- SR 260.3 milyon i pe ganny pourswiv
- SR 30.3 milyon i bann ka ki pa kapab ganny kolekte aköz bann taks payers in desede ouswa zot biznes in dizourd.
- SR 39.5 milyon i devan kot Tribinal Reveni

Msye Spiker, mazorite sa bann taks aryeraz i dan sa bann sekter swivan;

- Sekter Retail e Wholesale; 137 ka ki reprezant 26.1 poursan sa total
- Sekter tourizm; 104 ka ki reprezant 19.8 poursan sa total
- Sekter konstriksyon; 77 ka ki reprezant 17.2 poursan sa total
- Bann lezot sekter servis; 97 ka ki reprezant 17.9 poursan sa total

Msye Spiker, Komisyon Reveni ti kapab kolekte SR 379.5 milyon dan sa total aryeraz pour lannen 2018. Pour lannen 2019, SR 337.2 milyon nouvo aryeraz in ganny etabli. Dan sa sonm SR 153 milyon I dan taks biznes e SR 77.9 milyon I dapre Odit kin ganny fer lo VAT.

## **11. Konklizyon**

Msye Spiker, Gouvernman in donn mwan sa manda pour negosye avek lakonpanyen Ascon pour bann peyman konpansasyon polisyon La Mizer. Monn konmans diskisyon avek Anbasader UAE ki baze Sesel e mon ekspekte kontiny diskisyon dan konmansman 2020.

Msye Spiker, i annan bokou kin ganny dir pandan sa trwa zour me letan pa permet mwan pour reponn tou sa kestyon kin ganny demande, akoz sansan mon osi mon pou reponn dan trwa zour. Alors i annan larepons ki mon bann lezot koleg Minis pour reponn dan staz komite.

Msye Spiker, parey monn dir dan lannons bidze ki realizasyon bidze 2020, i en travay kolektif. Alors Gouvernman pour bezwen reste anganze avek son azanda ki monn monsyannen pour lannen 2020 e pour fer sir ki bidze 2020 i vin en realite. Nou bezwen travay pli dir koman en nasyon e fer sir ki nou tou, nou war nou dan sa enplimantasyon bidze 2020 avek tenm ***“Rezilta Ekitab-Prosperite Partaze”***.

Mersi Msye Spiker.